

671.1455
084
15

南宮縣志



南宮縣志卷二十一

鹽山賈恩紱編輯

掌故志

謠俗篇

風俗

鹽山縣志卷二十一

康熙志云南宮無山林川澤之饒地質晳白平廣人皆織
節儉射機利以自益男子安耕鑿以供徭役女子勤紡織以
持門戶雖貧苦亦不至凍餒道光志云俗尙簡樸性多遲重
士習詩書農務耕作其次則學商賈習工業其弊也富家競
爲奢華頑梗喜於逋負游惰者輕去其鄉投官府權門爲廝
役狡黠者則架唆詞訟魚肉良善整齊教誨是上焉者之責
也舊志所載凡若此顧自今言之史漢所稱燕趙士廣俗雜

性懷急仰機利而食隋書宋志所謂性敦厚務農桑好尙儒術號爲強伎諸語大約所該者廣不專指一州一縣而言然大端與舊志所載亦無懸殊者茲縱覽古今分述大略亦有心者所樂聞也蓋以文化而言隋唐以前尙已唐以詩賦爲重河朔最多英特而南宮張昌齡兄弟以詞章名家流風餘韵沾丐後進迄於宋元如張玘康繼禮之徒文采猶足名世至明代白氏父子經濟文學尤爲一方弁冕而劉濂兄弟之著作斐然亦當時之豪雋張道夫張庚諸人砥礪名行尤堪矜式至清代而文化益進矣書院義學日增月盛宋文運杜鎮張光豸鄭維孜諸人皆科第中之杰出者清季吳公汝綸爲冀州牧振興文教不遺餘力賢士挺興南宮科甲不惟稱

盛一時而文章爾正不復囿於科舉帖括之中亦頗有其人
劉登瀛孝廉李剛已大令其選也清末維新變書院義學而
爲學堂科學說盛而經史弁髦夫學以明體達用修齊治平
爲歸始可以言學科學通一技明一術爲一名一物之專家
足矣以言治平之道猶適越而北其轅也爲潮流所轉者詆
歷代學術爲糠粃而崇科學爲神聖所詬病者不過以帖括
制藝爲口實抑知專制藝者乃士子苟且取巧流弊之所至
歷朝設庠序以造士者功令具在不聞以專攻制藝詔士者
也爲此論者是謂因噎而廢食科學設爲一科以教無修齊
之志者非不可也然祇可謂之爲技爲藝不當以冒學道之
名所敢斷言也今變學制者二十餘年矣求一白公名業及

劉微山著述之才殊不多見殆非人才之不如古所學者異也農家篤於守舊乃北方之通病近日稍知變通造肥料鑿新井者日有所聞苛捐若除農業不難復興也冀州屬以地少人眾之故

賦役中丁地比較可証

經商者多於它縣天津保定北京

南宮之商尤多史公所謂仰機利而食者也顧什伯之利優於農家故奢靡亦因之而生冀州舊志謂中人之產動衣文繡擔石之儲輒厭膏粱殆商開之而農效之亦一弊也且南宮爲四方輻湊之區大名以北金融漲落一惟南宮是視古諺云臨清水馬頭南宮旱馬頭與獻縣之尹村皆以鄉邑而操金融之權商業發達蓋亦久矣工業不外尋常日用之品昔日家庭皆以紡織爲正業通商以來爲洋布洋線所擠不

數工本相率休其蠶織近年威縣有張雪尼者創造手搖紡紗車十小時可出線二斤土布亦有新式輪機略如高陽機布將來可有振興之望食貨皮革銅鐵諸業改良進步亦復不少

參見物產篇

此工業之現況也總之四民之業爲立國之要

素南宮皆不後于它邑得良有司及有心士紳因勢利導澆漓之習皆可返於純良奢華之風無難漸知節儉而移風易俗之人尤以士習純駁爲樞紐不逐潮流力培根本端學術正人心彼視此爲老生常談者烏知此哉烏知此哉

右風俗

自古以冠婚喪祭四者爲禮之大端惟冠禮自宋元以來已云久廢北方婚禮於親迎之前具衣冠拜祖宗及親族長者

南宮縣志 卷二十一
三
殆卽加冠延賓之意并於婚禮矣

婚禮 婿家遣媒妁通言于婦家婦家諾則書子女之生年

月日及時

俗曰八字

互換之

或曰換庚帖

又互通主婚家長之名字

俗曰

鈔號

遂換婚書婿家則作求允之詞女家則作允諾之詞彼此

稱姻家是爲訂婚之始將婚婿家具束致女家請議吉期婦家答曰唯命乃擇日送於婦家屆期前一日婿送妝衣首飾先以羊酒曰催妝婦家先期送奩具曰鋪牀吉日或行親迎禮或用俟著禮親迎婿具衣冠籠燭鼓樂簇擁新婿至婦家拜外舅外姑行奠雁禮禮畢婿先行新婦以紅羃蒙首升綵輿隨婿至家中庭設香案花燭弓矢斗權銅鏡之屬夫婦並拜曰拜堂婿以權去新婦之羃而置之楣入房行合卺禮其

俟著者不親迎婦家以綵轎送至婿家拜堂以下與親迎禮同三日婿偕新婦至女家曰回門光緒志云古猶簡樸今則盛陳樂部儀從至百餘人婦家妝奩動至數百金踵事增華未免過侈鄉俗又有乘喪嫁娶者惡俗在所當禁矣至民國以來自由平等之說盛至廢媒妁父母之命自由結婚擇日相會招集友朋或請證婚一人夫婦相鞠躬同車而歸六禮不備號曰文明然輕於合者亦輕於離離婚之風普及全國而夫婦之道苦矣

喪禮 初喪男子披髮女去簪珥躑躅哭泣設靈牀覆單衾張素帷曰小斂懸紙馬紙錢於門親族赴城隍廟招魂謂卽古之復禮三日大斂立旌成服斂時以灰鋪棺以棉絮拭目

南宮縣志 卷二
淨面以棉塞周身之隙每逢七日哭奠

俗曰做七

過五七則止訃

告親友率素服往弔葬期近則數月遠則不踰三年以爲常
葬日延長老一二人經紀其喪葬日路經親友之門則有路
祭戚故徒步執紼送喪塋祭延介賓一人以祭土神三日孝
子夫婦詣墳祭奠繞墳築土洒水曰圓墳

祭禮 凡載在祀典之祭具見于會典諸書非一縣所得私
舊志載典禮一門殊嫌詞費茲故刪而弗錄其行於鄉邑者
惟庶人祭先之禮爾士夫家祭于宗祠無祠則祭于寢祭于
主祭于墓歲時中已具大略茲擇要如左元旦以祭品紙箔
祭先清明則掃墓築墳以庶饒焚紙錢拜墓端午薦角黍麥
熟則薦新中元薦瓜果焚紙謁墓八月望則陳瓜果于中庭

以祭月十月朔焚紙拜墓或祭主前歲除設祭達旦月逢朔望則拈香此歲時常祭也此外忌日齋戒素服祭以時食行禮主前無主則設位爲特祭先人生日南方亦多祭者北方則罕又或祝陰壽則誕矣

右四禮

正月元旦宵分長幼新衣冠具香燭牲肴酒醴祀先祖百神燃爆竹進椒酒徧拜尊長舉家歡宴食餃餌

取父子更新之義

親族

里鄰交相賀數日乃罷

立春日以蘿菔爲細菜五辛爲春盤麵曰春餅謂之嘗春十五日曰元宵張燈三夜十四日至十六日以爲常施放燈

以油

和黍麵爲之

井曰戶雷各置一盞輝如列星街衢設燈紮彩鳴金

鼓爲火樹銀花之戲食元宵

製糖麵如球

曰元宵子

十六日結伴游行曰走百病入夜燈彩簫鼓視上元尤勝

二十五日曰填倉用灶灰以箕盛之撒地作囤形置五穀覆以甌石燃燈置其上日出雞飼之

二月二日日中和節亦曰挑菜節擔水滿甕曰引龍是日食餃餌曰龍角湯餅曰龍鬚童子以帚敲梁及坑誦俚詞作吉語俗謂是日龍抬頭日

三月三日曰上巳士子修禊飲宴男女踏青出游

清明前一日曰寒食禁火添墳土屈日上墓供牲醴焚紙錢取柳插門男女皆簪柳云可令目清不盲

四月四日釀酒八日浴佛

五月五日曰端午門首插艾懸符以避五毒剪紅紙作葫蘆狀帖之以五綵絲繫兒臂曰長命縷一曰百歲索飲雄黃酒以竹葉裹黍糯爲糗曰角黍親友交餽曰解糗

六月六日曝書及衣服興福寺作盂蘭會取樓上藏經互傳送謂之晒經

七月七日曰七夕女子鏤瓜果祀織女穿針乞巧十五日中元一曰盂蘭節焚楮幣祭先墓

八月十五日爲中秋節飲酒食月餅陳瓜果酒肴于庭以祭月二十七日孔子聖誕行釋菜禮

九月九日日重陽登高飲酒賞菊居人食餛飩

十月朔爲下元節祭掃先墓或祭于主剪楮爲衣焚之曰送

寒衣

十一月冬至士子謁先聖如聖誕之禮製九九消寒圖

十二月初八日食粥以米黍稻豆和煮之或施粥以濟貧民
二十三日設酒脯祀灶神薦以飴糖

三十日日歲除易門神換桃符楹聯具祭品以祀先兼祭墓
飲椒酒燃爆竹自夜達旦

右月令

南宮縣志卷二十一終

邑人邢之襄校